

“RO‘YXATGA OLINGAN”

O‘zbekiston Respublikasi

Markaziy banki

2025-yil “29” avgust
89 - son

O‘zbekiston Respublikasi

Markaziy bank raisining

birinchi o‘rinbosari



Z. N. Saydullayev

“OPEN BANK” AKSIYADORLIK JAMIYATINING

USTAVI

(yangi tahriri)

“TASDIQLANGAN”

Aksiyadorlarning yillik

umumiy yig‘ilishining

2025-yil 17-iyundagi

4-sonli yig‘ilish bayonnomasi

Kuzatuv kengashi raisi

Sh.A. Tashpo‘lov

Toshkent – 2025-yil.

1-bob. Umumiy qoidalar

1. “Open bank” aksiyadorlik jamiyati (keyingi o‘rinlarda matnda Bank deb yuritiladi) O‘zbekiston Respublikasining “Banklar va bank faoliyati to‘g‘risida”gi, “Aksiyadorlik jamiyatlari va aksiyadorlarning huquqlarini himoya qilish to‘g‘risida”gi Qonunlari va boshqa qonun hujjatlarilarga hamda Bank muassisining 2022 yil 22 avgustdagi 1-sonli ta’sis yig‘ilish qaroriga asosan tashkil etilgan.

2. Bank o‘z faoliyatida O‘zbekiston Respublikasining Fuqarolik kodeksi, “Banklar va bank faoliyati to‘g‘risida”gi, “Aksiyadorlik jamiyatlari va aksiyadorlarning huquqlarini himoya qilish to‘g‘risida”gi Qonunlariga, boshqa qonun hujjatlariga va mazkur Ustavga amal qiladi.

3. Bank aksiyadorlik jamiyati shaklida tashkil etilib, bank xizmatlari sifatini, tezkorligini va qulayligini oshirishga qaratilgan raqamli bank hisoblanadi.

4. Bank o‘zining tashkiliy-huquqiy shakli ko‘rsatilgan to‘liq firma nomiga va qisqartirilgan firma nomiga ega.

Bankning firma nomi:

davlat tilida: to‘liq – “Open bank” aksiyadorlik jamiyati, qisqartirilgan nomi – “Open bank” AJ;

rus tilida: to‘liq – Акционерное общество “Open bank”, qisqartirilgan nomi – АО “Open bank”;

ingliz tilida: to‘liq - Joint stock company “Open bank”, qisqartirilgan nomi –JSC “Open bank”.

Bank o‘z firma nomidan mutlaq foydalanish huquqiga ega.

5. Bank o‘zining firma nomi davlat tilida to‘liq yozilgan hamda joylashgan yeri ko‘rsatilgan yumaloq muhrga ega bo‘ladi. Muhrda bir vaqtning o‘zida firmaning nomi boshqa istalgan tilda ham ko‘rsatilishi mumkin.

Bank o‘zining nomi yozilgan shtamp va blankalarga, o‘z timsoliga, shuningdek belgilangan tartibda ro‘yxatdan o‘tkazilgan tovar belgisiga hamda fuqarolik muomalasi ishtirokchilarining, tovarlarning, ishlarning va xizmatlarning xususiy alamatlarini aks ettiruvchi boshqa vositalarga ega bo‘lishga haqli.

6. Bank yuridik shaxs bo‘lib, u o‘z mustaqil balansida hisobga olinadigan alohida mol-mulkka ega bo‘ladi, o‘z nomidan mulkiy va shaxsiy nomulkiy huquqlarni olishi hamda amalga oshirishi, zimmasiga majburiyatlar olishi, sudda da’vogar va javobgar bo‘lishi mumkin.

7. Bank o‘z majburiyatlari yuzasidan o‘ziga tegishli barcha mol-mulk bilan javobgar bo‘ladi. Bank aksiyadorlarning majburiyatlari yuzasidan javobgar bo‘lmaydi.

Aksiyadorlar Bankning majburiyatlari yuzasidan javobgar bo‘lmaydi va uning faoliyati bilan bog‘liq zararlarning o‘rnini o‘zlariga tegishli aksiyalar qiymati doirasida qoplash tavakkalchiligini o‘z zimmasiga oladi.

Bank davlatning majburiyatlari bo‘yicha, davlat esa Bankning majburiyatlari

bo'yicha javob bermaydi, bundan Bankning yoki davlatning o'zi bunday majburiyatlarni zimmasiga olish hollari mustasno.

8. Bank o'z faoliyatini O'zbekiston Respublikasining Markaziy banki (bundan buyon matnda Markaziy bank deb yuritiladi) tomonidan berilgan litsenziya asosida amalga oshiradi va cheklanmagan muddatga tashkil etiladi.

9. Bank o'z manfaatlarini himoya qilish hamda birgalikdagi dasturlarni amalga oshirish maqsadida uyushmalar va boshqa birlashmalarda qatnashishi mumkin.

10. Bankning joylashgan yeri (pochta manzil): 100000, O'zbekiston Respublikasi, Toshkent shahri, Yunusobod tumani, Shaxrisabz ko'chasi, 2-uy. Elektron pochta manzil: office@openbank.uz, veb manzil: www.openbank.uz.

2-bob. Bank faoliyatining maqsad va vazifalari.

11. Bank o'z faoliyatini tijorat asosida amalga oshiradi. Bankning asosiy maqsadi yuridik va jismoniy shaxslarga amaldagi qonunchilik hujjatlariga muvofiq keng ko'lamdagi sifatli va zamonaviy bank xizmatlarini ko'rsatish hamda foyda olishdan iborat.

12. Bank masofaviy bank xizmatlari ko'rsatish kanallari orqali barcha turdagi bank xizmatlarini taqdim etuvchi raqamli bank sifatida faoliyat yuritishni o'z oldiga maqsad qilib, quyidagi asosiy vazifalarni amalga oshirishni belgilab qo'ygan:

masofaviy bank xizmatlarini ko'rsatuvchi zamonaviy informatsion texnologiyalardan foydalanib zamonaviy raqamli moliyaviy xizmatlarni keng joriy qilish;

24/7 rejimida ishlaydigan onlayn bank xizmatlarini ko'rsatish;

tez va qulay skoring tahlillar asosida jismoniy va yuridik shaxslarga moliyalashtirish xizmatlarini ko'rsatish;

jismoniy va yuridik shaxslarga P2P va P2C xizmatlarini ko'rsatish;

xizmat ko'rsatish sifati va tezkorligini oshirish uchun innovatsion moliyaviy mahsulotlarni joriy etish;

aholiga o'z biznesini yuritishda yanada qulayliklar yaratish imkoniyatlari vujudga keltirish;

xalqaro moliya institutlari va yetakchi xorijiy banklarning investitsiyalari va grantlarini jalb etib, keyinchalik iqtisodiyotning barcha sohalarida faoliyat yurituvchi xo'jalik yurituvchi subyektlar hamda jismoniy shaxslarni ana shu mablag'lar hisobiga moliyalashtirish.

3-bob. Bank operatsiyalari

13. Bank amaldagi qonun hujjatlariga muvofiq quyidagi moliyaviy operatsiyalarni amalga oshiradi:

pul mablag'larini omonatlarga (depozitlarga) jalb etish;

to'lovlarni amalga oshirish, shu jumladan bank hisobvaraqlarini ochmasdan amalga oshirish;

jismoniy va yuridik shaxslarning bank hisobvaraqlarini, shu jumladan banklarning vakillik hisobvaraqlarini ochish hamda yuritish;

kreditlarni ularning qaytarilishi, foizlilik va muddatliligi sharti bilan o'z nomidan o'zining mablag'lari hamda jalb etilgan mablag'lar hisobidan berish;

chet el valyutasi bilan naqd va naqdsiz shakllardagi operatsiyalar;

jismoniy yoki yuridik shaxs bilan tuzilgan shartnoma bo'yicha mol-mulkni ishonchli boshqarish;

inkassatsiya va kassa xizmatlarini ko'rsatish;

uchinchi shaxslar nomidan ularning majburiyatlari bajarilishini nazarda tutuvchi kafolatlar berish va boshqa majburiyatlarni qabul qilish;

uchinchi shaxslardan pul shaklidagi majburiyatlarning bajarilishini talab qilish huquqini olish (faktoring);

qimmatli qog'ozlarni chiqarish, xarid qilish, sotish, ularning hisobini yuritish va ularni saqlash, mijoz bilan tuzilgan shartnomaga binoan qimmatli qog'ozlarni boshqarish, ular bilan boshqa operatsiyalarni bajarish;

affinlangan qimmatbaho metallar sotib olish va sotish, shu jumladan metallarni mas'ul saqlash hisobvaraqlarini hamda metallarning egasizlantirilgan (jismoniy bo'lmagan) hisobvaraqlarini yuritish;

qimmatbaho metallardan yasalgan tangalarni sotib olish va sotish;

hosilaviy moliya vositalari (derivativlar) bilan operatsiyalarni amalga oshirish;

hujjatlarni yoki qimmatliklarni saqlash uchun maxsus binolarni yoki ularning ichidagi seyflarni ijaraga berish;

lizing berish;

qonunchilikda nazarda tutilgan shakllarda qarzlar berish;

moliyaviy operatsiyalar bilan bog'liq maslahat xizmatlari ko'rsatish;

aktivlar majmuini (portfelini) boshqarish;

elektron pullarni chiqarish, ulardan foydalanish va to'lash;

bank kartalarini berish va to'lovlarga ishlov berish, bank kartalariga boshqa tashkilotlar, jumladan boshqa moliya institutlari bilan birgalikda xizmat ko'rsatish.

Bank banklar va bank faoliyati to'g'risidagi qonunchilikka muvofiq boshqa moliyaviy operatsiyalarni amalga oshiradi.

14. Bank Markaziy bankda, boshqa vakolatli rezident va norezident banklar hamda kredit tashkilotlarida, qonunchilik hujjatlarida belgilangan tartibda pul mablag'larini saqlash va o'z operatsiyalarini amalga oshirish uchun vakillik hisobvarag'ini ochadi.

4-bob. Bankning huquq va majburiyatlari

15. Bank quyidagi huquqlarga ega:

o'zining umumiy manfaatlarini himoya qilish hamda birgalikdagi dasturlarni amalga oshirish maqsadida uyushmalar va boshqa birlashmalar tuzishga;

qonun hujjatlarida belgilangan tartibda vakolatxonalar ochishga;

chet elda sho'ba banklar ochish va filiallar tashkil etish, banklarning kapitalida ishtirok etish, shu jumladan chet el banklarini tashkil etishda ishtirok etishga;

shartnoma asosida pul mablag'larini depozitlar, kreditlar shaklida jalb etishi va ularga joylashtirishi, hisob-kitob markazlari va vakillik hisobvaraqlari orqali hisob-kitoblarni amalga oshirishi hamda litsenziyada nazarda tutilgan boshqa moliyaviy operatsiyalarni bajarishga;

mijozlar o'rtasidagi munosabatlarni shartnomalar asosida amalga oshirish, shartnomalar shartlarini, kreditlar, depozitlar bo'yicha foiz stavkalari, bank operatsiyalariga oid vositachilik haqi miqdorini mustaqil belgilashga;

xizmatlar va operatsiyalarni amalga oshirish shartlari va tartibini tasdiqlashga;

xizmatlar va operatsiyalarni shartnoma asosida va uzluksiz asosda amalga oshirish uchun uchinchi tarafga autsorsinga topshirishga;

sof foyda hamda boshqa mablag'lar hisobidan zaxiralar va fondlar tashkil etishga;

qimmatli qog'ozlar bozorida professional faoliyatni amalga oshirishga;

moliya va xo'jalik organlarida korxonalar va tashkilotlar manfaatlarini ularning ishonchnomalari bo'yicha ifodalashga.

16. Bank bevosita ishlab chiqarish, savdo, sug'urta faoliyati hamda banklar va bank faoliyati to'g'risidagi qonunchilikda nazarda tutilgan moliyaviy operatsiyalarni amalga oshirish bilan bog'liq bo'lmagan boshqa faoliyat bilan shug'ullanishga haqli emas.

Ushbu cheklov quyidagi hollarga nisbatan tatbiq etilmaydi:

bank kartalari asosida naqd pulsiz hisob-kitoblar tizimlarida foydalaniladigan ixtisoslashtirilgan uskunani va unga doir dasturiy ta'minotni sotish yoki ijaraga berishga;

o'z aktivlarini sotishga;

chek daftarchalarini chiqarish, realizatsiya qilish va tarqatishga;

sug'urta tashkilotlari bo'lgan O'zbekiston Respublikasi rezidentlari nomidan sug'urta shartnomasi tuzilishini tashkil etish bo'yicha faoliyatni amalga oshirishga;

Bank o'zi muassis bo'lgan yuridik shaxslarga o'z mol-mulkini mulkiy ijara (arenda) shartnomasiga muvofiq ijaraga berishga.

17. Bank quyidagilarga majburdir:

Markaziy bank tomonidan belgilanadigan prudensial normativlarga rioya etish;

Markaziy bank tomonidan belgilangan majburiy zaxiralash talablarini bajarish;

Markaziy bank tomonidan belgilangan ichki nazoratga hamda tavakkalchiliklarni boshqarish tizimiga doir talablarga rioya etishi;

kredit va lizing operatsiyalari bo'yicha ehtimol tutilgan zararlarni qoplash

uchun Markaziy bank tomonidan belgilangan tartibda va miqdorlarda zaxiralar tashkil etish;

garovning (shu jumladan mol - mulk shaklidagi garovning), beriladigan kafolatlar, kafilliklar va majburiyatlarning yetarliligini hisobga oladigan hamda beriladigan kreditlar ta'minlanishining ichki normativ tartibini belgilash;

o'z faoliyati to'g'risidagi axborotni qonunchilik hujjatlarida belgilangan tartibda oshkor etish;

Bankda ichki audit xizmati mavjud bo'lishini ta'minlash;

jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolini tarqatishni moliyalashtirishga qarshi kurashish to'g'risidagi qonunchilik hujjatlari talablariga rioya etish;

qonun hujjatlariga muvofiq bank sirini yoki boshqa sirni tashkil etadigan ma'lumotlarning oshkor etilmasligini ta'minlash.

18. Bank qonunchilik hujjatlariga muvofiq boshqa huquq hamda majburiyatlarga ham ega.

5-bob. Bank ustav kapitalining miqdori, uni ko'paytirish va kamaytirish tartibi

19. Bankning ustav kapitali aksiyadorlar tomonidan sotib olingan Bank aksiyalarining nominal qiymatidan tashkil topadi va O'zbekiston Respublikasining milliy valyutasida ifodalanadi. Ustav kapital kreditorlar manfaatlarini kafolatlaydigan Bank mol-mulkinging eng kam miqdorini belgilaydi.

20. Bankning ustav kapitali 500 000 000 000 (Besh yuz milliard) so'mni tashkil qiladi va har birining nominal qiymati 1 000 (Bir ming) so'm bo'lgan 500 000 000 (Besh yuz million) dona egasining nomi yozilgan hujjatsiz shakldagi oddiy aksiyalardan iborat.

21. Bankning e'lon qilingan (qo'shimcha) chiqarilishi mumkin bo'lgan aksiyalarning eng ko'p miqdori bir donasining nominal qiymati 1 000 (Bir ming) so'm bo'lgan 1 000 000 000 (Bir milliard) dona oddiy aksiyalar tashkil qiladi.

22. Bank ustav kapitalini ko'paytirish va kamaytirish O'zbekiston Respublikasining amaldagi qonunchilik hujjatlariga muvofiq belgilangan tartibda amalga oshiriladi.

23. Bankning ustav kapitali qo'shimcha aksiyalarni joylashtirish yo'li bilan ko'paytirilishi mumkin. Qo'shimcha aksiyalar faqat ushbu Ustavda belgilangan e'lon qilingan aksiyalarning soni doirasida joylashtiriladi.

Bank ustav kapitalini qo'shimcha aksiyalarni joylashtirish yo'li bilan ko'paytirish qonunchilik hujjatlarida belgilangan tartibda jalb qilingan investitsiyalar, Bankning o'z kapitali va hisoblangan dividendlar hisobidan amalga oshirilishi mumkin.

24. Bankning ustav kapitali aksiyalarning nominal qiymatini kamaytirish yoki aksiyalarning umumiy sonini qisqartirish yo‘li bilan, shu jumladan aksiyalarning bir qismini keyinchalik bekor qilgan holda Bank tomonidan aksiyalarni olish yo‘li bilan kamaytirilishi mumkin. Bank ustav kapitalini aksiyalarning bir qismini sotib olish va bekor qilish yo‘li bilan kamaytirishi mumkin.

Bank ustav kapitalini kamaytirilishi qonunchilik hujjatlarida belgilangan eng kam miqdoridan kamayishiga olib keladigan holatlarda Bank ustav kapitalini kamaytirishga haqli emas.

Qonunchilik hujjatlarida nazarda tutilgan hollarda, ustav kapitalning kamayganligi to‘g‘risidagi ma’lumotlar e’lon qilinishi shart.

6-bob. Bank aksiyalari, korporativ obligatsiyalari va boshqa qimmatli qog‘ozlari. Ularni joylashtirish tartibi va shartlari.

25. Bankning aksiyalari egasining nomi yozilgan oddiy emissiyaviy qimmatli qog‘ozlar hisoblanadi. Bank qonunchilik hujjatlarida belgilangan tartibda imtiyozli aksiyalar chiqarishi mumkin.

Bank aksiyalarining nominal qiymati 1 000 (Bir ming) so‘mni tashkil etadi. Bank chiqariladigan barcha aksiyalarning nominal qiymati bir xil bo‘lishini ta’minlaydi.

Bankning aksiyalari egalari qonunchilik hujjatlarida belgilangan tartibda huquq va majburiyatlarga ega.

Aksiyalarning haqi to‘liq to‘langunga qadar va uning yangi egasi aksiyadorlar reyestrda ro‘yxatga olingunga qadar aksiya ovoz berish huquqini bermaydi.

26. Bank aksiyalar, korporativ obligatsiyalar va boshqa qimmatli qog‘ozlar chiqarishga hamda ularni joylashtirishga haqli.

Bank aksiyalari ochiq va yopiq obuna o‘tkazish orqali joylashtiriladi. Bankning aksiyalariga, korporativ obligatsiyalariga va boshqa qimmatli qog‘ozlariga haq to‘lash faqat pul mablag‘lari bilan amalga oshiriladi.

Bankning aksiyalarini, korporativ obligatsiyalarini va boshqa qimmatli qog‘ozlarini joylashtirish usullari qimmatli qog‘ozlarni chiqarish to‘g‘risidagi qaror bilan belgilanadi.

Joylashtirilayotgan aksiyalarning, korporativ obligatsiyalarning va boshqa qimmatli qog‘ozlarning soni ularni chiqarish to‘g‘risidagi qarorda ko‘rsatilgan miqdordan ko‘p bo‘lmasligi lozim.

Bank tomonidan qo‘shimcha aksiyalarni va boshqa emissiyaviy qimmatli qog‘ozlarini joylashtirish muddati ularning chiqarilishi davlat ro‘yxatidan o‘tkazilgan paytdan boshlab bir yildan oshmasligi kerak.

7-bob. Aksiyalarni yoki aksiyalarga ayirboshlanadigan emissiyaviy qimmatli qog'ozlarni sotib olishga bo'lgan imtiyozli huquq

27. Bank tomonidan aksiyalarni va aksiyalarga ayirboshlanadigan, haqi pul mablag'lari bilan to'lanadigan emissiyaviy qimmatli qog'ozlarni joylashtirishda ovoz beruvchi aksiyalarning egalari bo'lgan aksiyadorlar ularni imtiyozli ravishda olish huquqiga ega. Aksiyador, shu jumladan aksiyadorlarning umumiy yig'ilishida qarshi ovoz bergan yoxud unda ishtirok etmagan aksiyador aksiyalarni va aksiyalarga ayirboshlanadigan emissiyaviy qimmatli qog'ozlarni o'ziga tegishli shu turdagi aksiyalar miqdoriga mutanosib miqdorda imtiyozli olish huquqiga ega.

Bunda Bank aksiyalarning yoki aksiyalarga ayirboshlanadigan emissiyaviy qimmatli qog'ozlarning chiqarilishi davlat ro'yxatidan o'tkazilgan sanadan e'tiboran o'n kun ichida ommaviy axborot vositalarida e'lon qilish orqali o'zining imtiyozli huquqqa ega bo'lgan aksiyadorlariga aksiyalarni yoki aksiyalarga ayirboshlanadigan emissiyaviy qimmatli qog'ozlarni mazkur aksiyadorlarda mavjud bo'lgan aksiyalar soniga mutanosib ravishda teng shartlarda, qimmatli qog'ozlarni chiqarish to'g'risida qarorda belgilangan joylashtirish narxi bo'yicha olishni taklif etiladi.

Bildirish matnida joylashtirilayotgan aksiyalarning va aksiyalarga ayirboshlanadigan emissiyaviy qimmatli qog'ozlarning soni, ularni joylashtirish narxi, har bir aksiyador olishga haqli bo'lgan aksiyalarning va aksiyalarga ayirboshlanadigan emissiyaviy qimmatli qog'ozlarning sonini aniqlash tartibi, aksiyadorlarning bu huquqi amal qiladigan muddat va uni amalga oshirish tartibi to'g'risidagi ma'lumotlar bo'lishi lozim.

28. Imtiyozli huquqqa ega bo'lgan aksiyadorlarning ro'yxati aksiyalarni sotish yoki qimmatli qog'ozlarni chiqarish to'g'risidagi qaror qabul qilingan sanadagi Bank aksiyadorlari reyestrining ma'lumotlari asosida tuziladi.

Imtiyozli huquqqa ega bo'lgan aksiyador aksiyalarni va aksiyalarga ayirboshlanadigan emissiyaviy qimmatli qog'ozlarni olishi to'g'risida o'zining ismi-sharifi (nomi) va yashash joyi (joylashgan yeri), o'zi oladigan emissiyaviy qimmatli qog'ozlarning soni ko'rsatilgan yozma shakldagi arizani va haq to'laganlik to'g'risidagi hujjatni Bankka yuborish orqali o'z imtiyozli huquqini to'liq yoki qisman amalga oshirishga haqli. Bunday ariza mazkur imtiyozli huquqning amal qilish muddati ichida Bankka taqdim etilishi kerak.

Imtiyozli huquqning amal qilish muddati, agar bu muddat o'tguniga qadar Bankning barcha aksiyadorlaridan imtiyozli huquqdan foydalanish to'g'risida yoki undan foydalanishdan voz kechish haqida yozma ravishda arizalar olingan bo'lsa, tugaydi.

Bank imtiyozli huquqning amal qilish muddati tugaguniga qadar aksiyalarni va aksiyalarga ayirboshlanadigan emissiyaviy qimmatli qog'ozlarni ularni olish bo'yicha imtiyozli huquqqa ega bo'lmagan shaxslarga joylashtirishga yoki sotishga

haqli emas.

Imtiyozli huquqdan boshqa shaxs foydasiga voz kechishga yo'l qo'yilmaydi.

8-bob. Bank aksiyadorlarining huquq va majburiyatlari

29. Bankning aksiyadorlari quyidagi huquqlarga ega:

Bankning aksiyadorlari reyestriga kiritilish;

depo hisobvarag'idan o'ziga taalluqli ko'chirma olish;

Bank foydasining bir qismini dividendlar tarzida olish;

Bank tugatilgan taqdirda o'ziga tegishli ulushga muvofiq mol-mulkning bir qismini olish;

aksiyadorlarning umumiy yig'ilishlarida ovoz berish orqali Bankni boshqarishda ishtirok etish;

Bankning moliya-xo'jalik faoliyati natijalari to'g'risida to'liq va ishonchli axborotni belgilangan tartibda olish;

olgan dividendini erkin tasarruf etish;

qimmatli qog'ozlar bozorini tartibga solish bo'yicha vakolatli davlat organida, shuningdek sudda o'z huquqlarini himoya qilish;

o'ziga yetkazilgan zararning o'zni qoplanishini belgilangan tartibda talab qilish;

o'z manfaatlarini ifodalash va himoya qilish maqsadida uyushmalarga va boshqa nodavlat notijorat tashkilotlariga birlashish;

qimmatli qog'ozlarni olishda zarar ko'rish, shu jumladan boy berilgan foyda ehtimoli bilan bog'lik tavakkalchiliklarni sug'urta qilish;

Bank aksiyalari beradigan huquqlarni (huquqlarning bir qismini) qonunchilik hujjatlarida belgilangan tartibda ishonchnoma asosida o'z vakiliga (vakillariga) berish;

Bank aksiyadorlari qonunchilik hujjatlariga va mazkur Ustavga muvofiq boshqa huquqlarga ham ega bo'ladilar.

30. Bir turdagi aksiya unga egalik qiluvchi har bir aksiyadorga shu turdagi aksiyalarning boshqa egalari bilan bir xil bo'lgan xajmdagi huquqlarni beradi.

Aksiyador tomonidan huquqlarning amalga oshirilishi boshqa aksiyadorlarning huquqlari va qonun bilan qo'riqlanadigan manfaatlarini buzmasligi lozim.

31. Aksiyadorlar quyidagilarga majbur:

mazkur Ustavda ko'rsatilgan tartibda, miqdorda va usullarda aksiyalarning narxini to'lash;

mazkur Ustav va qonun hujjatlari talablariga rioya qilish;

o'z aksiyalariga bo'lgan huquqlarini hisobga olish bo'yicha xizmatlar ko'rsatuvchi depozitariyni va (yoki) investitsiya vositachisini o'ziga oid ma'lumotlardagi o'zgarishlar haqida o'z vaqtida xabardor qilish;

bank va tijorat sirlarni tashkil etuvchi axborotni va qonun bilan qo'riqlanadigan

boshqa maxfiy ma'lumotlarni oshkor etmaslik;

bank faoliyatiga oid va boshqa qonunchilik hujjatlari talablariga muvofiqlikni ta'minlash maqsadida Bank tomonidan so'ralgan ma'lumotlarni o'z muddatida taqdim etish;

amaldagi qonun hujjatlari va ushbu Ustavda nazarda tutilgan boshqa majburiyatlarni bajarish.

32. Bankning boshqa aksiyadorlari tomonidan sotilayotgan aksiyalarni uchinchi shaxsga taklif etilayotgan narx bo'yicha va shartlar asosida, aksiyadorlarning har biriga tegishli aksiyalarning soniga mutanosib ravishda olish yuzasidan aksiyadorlar uchun imtiyozli huquq mavjud.

Bankning boshqa aksiyadorlari o'z imtiyozli huquqlaridan foydalanmagan bo'lsa, Bankning aksiyadorlari sotayotgan aksiyalarni olish yuzasidan Bankda imtiyozli huquq mavjud.

Bunda o'z aksiyalarini sotayotgan aksiyador aksiyalarini sotish niyati to'g'risida boshqa aksiyadorlarni aksiyalarning narxini va uchinchi shaxsga taklif etish shartlarini ko'rsatgan holda to'g'ridan-to'g'ri yoxud Bank orqali yozma shaklda xabardor qilishi shart.

Imtiyozli huquqning amal qilish muddati aksiyadorlar uchun aksiyalarni sotish niyati to'g'risida xabardor qilingan paytdan e'tiboran yigirma kunni tashkil etadi.

Agar imtiyozli huquqning amal qilish muddati ichida boshqa aksiyadorlar tomonidan bank aksiyalarini sotib olishga taklif kelib tushmagan taqdirda, o'z aksiyalarini sotayotgan aksiyador aksiyalarini sotish niyati to'g'risida Bankni yozma shaklda xabardor qiladi.

Bank uchun imtiyozli huquqning amal qilish muddati aksiyalarni sotish niyati to'g'risida xabardor qilingan paytdan e'tiboran o'n kunni tashkil etadi.

Imtiyozli huquqning amal qilish muddati, agar bu muddat o'tguniga qadar Bankning barcha aksiyadorlaridan imtiyozli huquqdan foydalanish to'g'risida yoki undan foydalanishdan voz kechish haqida yozma ravishda arizalar olingan bo'lsa, tugaydi.

Aksiyador imtiyozli huquqning amal qilish muddati tugaguniga qadar aksiyalarni olish bo'yicha imtiyozli huquqqa ega bo'lmagan shaxslarga sotishga haqli emas.

Imtiyozli huquqdan boshqa shaxs foydasiga voz kechishga yo'l qo'yilmaydi.

Ushbu band qoidalari Bank aksiyadorlarning soni ellik nafargacha bo'lganda amal qiladi.

33. Bank aksiyalariga egalik qilishga doir ruxsatnoma va cheklov O'zbekiston Respublikasi "Banklar va bank faoliyati to'g'risida"gi Qonuni va boshqa qonun hujjatlari va Markaziy bankning meyoriy-huquqiy hujjatlariga muvofiq amalga oshiriladi.

9-bob. Bank sof foydasini taqsimlash, dividendlar to‘lash va zararni qoplash

34. Bank foydasi hisobidan barcha soliq va majburiy ajratmalar to‘langandan so‘ng qoladigan qismi sof foyda hisoblanadi va ushbu sof foyda Aksiyadorlar umumiy yig‘ilishi qaroriga muvofiq belgilangan tartibda taqsimlanadi.

35. Bankning sof foydasi zaxira fondlar tashkil etishga, dividendlar to‘lashga hamda boshqa maqsadlarga yo‘naltiriladi.

36. Dividend Bank sof foydasining aksiyadorlar o‘rtasida taqsimlanadigan qismidir. Dividendlar Bank tasarrufida qoladigan sof foydadan va (yoki) o‘tgan yillarning taqsimlanmagan foydasidan to‘lanadi.

37. Bank moliyaviy yilning birinchi choragi, yarim yilligi, to‘qqiz oyi natijalariga ko‘ra va (yoki) moliyaviy yil natijalariga ko‘ra, agar qonunchilik hujjatlari va mazkur Ustavda boshqacha qoida belgilanmagan bo‘lsa, joylashtirilgan aksiyalar bo‘yicha dividendlar to‘lash to‘g‘risida qaror qabul qilishga haqli.

Bankning moliyaviy yilning birinchi choragi, yarim yilligi va to‘qqiz oyi natijalariga ko‘ra dividendlar to‘lash to‘g‘risidagi qarori tegishli davr tugagandan keyin uch oy ichida qabul qilinishi mumkin.

38. Aksiyalarning har bir turi bo‘yicha dividendlar to‘lash, dividendning miqdori, uni to‘lash shakli va tartibi to‘g‘risidagi qaror Bank Kuzatuv kengashining tavsiyasi, moliyaviy hisobotning ishonchliligi haqida auditorlik xulosasi mavjud bo‘lgan taqdirda, moliyaviy hisobot ma’lumotlari asosida Aksiyadorlar umumiy yig‘ilishi tomonidan qabul qilinadi.

Dividendlarning miqdori Bank Kuzatuv kengashi tomonidan tavsiya qilingan miqdordan ko‘p bo‘lishi mumkin emas.

39. Dividend Aksiyadorlar umumiy yig‘ilishining qaroriga ko‘ra pul mablag‘lari yoki boshqa qonuniy to‘lov vositalari yoxud Bankning qimmatli qog‘ozlari bilan to‘lanishi mumkin.

Dividendlar to‘lash to‘g‘risidagi qarorda dividendlar to‘lash boshlanadigan va tugallanadigan sanalar ko‘rsatilgan bo‘lishi lozim. Dividendlar to‘lash muddati ushbu haqda qaror qabul qilingan kundan boshlab 60 (Oltmish) kundan kechiktirilishi mumkin emas.

Dividendlar miqdori ulardan undiriladigan soliqlarni inobatga olmagan holda e‘lon qiladi.

40. Dividendlarni to‘lash qonunchilik hujjatlarida taqiqlangan hollarda, Bank tomonidan dividendlarni to‘lash va to‘lash to‘g‘risidagi qarorni qabul qilishi taqiqlanadi.

41. Bank zararlari qonunchilikda belgilangan tartibda zaxira fondi hisobidan qoplanadi.

10-bob. Bankda zaxira fondi va boshqa fondlar hamda Bankning sof aktivlari

42. Bankda Bank ustav kapitalining 15 (O'n besh) foizidan kam bo'lmagan miqdorda zaxira fondi tashkil etiladi. Bankning zaxira fondi belgilangan miqdorga yetgunga qadar har yili sof foydaning 5 (Besh) foizidan kam bo'lmagan miqdorda ajratmalar o'tkazish orqali shakllantiriladi.

43. Boshqa mablag'lar mavjud bo'lmagan taqdirda, Bankning zaxira fondi Bankning zararlari o'rnini qoplash, Bankning korporativ obligatsiyalarini muomaladan chiqarish, imtiyozli aksiyalar bo'yicha dividendlar to'lash va Bankning aksiyalarini qaytarib sotib olish uchun mo'ljallanadi.

Bankning zaxira fondidan boshqa maqsadlar uchun foydalanish mumkin emas.

44. Bank qonunchilik hujjatlariga muvofiq boshqa fondlarni ham tashkil etishga haqli. Tashkil etiladigan fondlarning mablag'lari qonunchilik hujjatlariga muvofiq Bankning Kuzatuv kengashi qaroriga asosan ishlatiladi.

45. Bank sof aktivlarining qiymati buxgalteriya hisobi ma'lumotlari bo'yicha Bank aktivlari va majburiyatlarining umumiy summasi o'rtasidagi farq sifatida aniqlanadi.

11-bob. Bankning boshqaruv organlari

46. Quyidagilar Bankning boshqaruv organlari hisoblanadi:

Aksiyadorlar umumiy yig'ilishi;

Bank Kuzatuv kengashi;

Bank Boshqaruvi.

47. Bankning boshqaruv organlari faoliyatining mazkur Ustav va Bankning ichki meyoriy hujjatlari bilan tartibga solinmagan masalalari qonunchilik hujjatlari bilan tartibga solinadi.

48. Bank Kuzatuv kengashi va Bank Boshqaruvi ushbu Ustav va Bankning ichki meyoriy hujjatlari, Aksiyadorlar umumiy yig'ilishining qarorlari va qonunchilik hujjatlarida belgilangan vakolatlar doirasida Bank faoliyatiga rahbarlik qiladi.

Aksiyadorlar umumiy yig'ilishi.

49. Aksiyadorlar umumiy yig'ilishi Bankning yuqori boshqaruv organidir.

50. Aksiyadorlarning yillik umumiy yig'ilishi har yili moliya yili tugaganidan keyin olti oydan kechiktirmay o'tkaziladi.

Umumiy yig'ilishni Bank Kuzatuv kengashining raisi, u uzrli sabablarga ko'ra bo'lmagan taqdirda esa, Bank Kuzatuv kengashining a'zolaridan biri olib boradi.

51. Aksiyadorlarning yillik umumiy yig'ilishlar oralig'ida Aksiyadorlarning

navbatdan tashqari umumiy yig'ilishlari chaqirilishi va o'tkazilishi mumkin.

Aksiyadorlarning navbatdan tashqari umumiy yig'ilishi Bank Kuzatuv kengashining qaroriga ko'ra uning o'z tashabbusi asosida, shuningdek yozma talab taqdim etilgan sanada ovoz beruvchi aksiyalarining kamida besh foiziga egalik qiluvchi aksiyadorning (aksiyadorlarning) yozma talabi asosida o'tkaziladi. Amaldagi qonunchilik hujjatlariga ko'ra Markaziy bank Aksiyadorlarning navbatdan tashqari umumiy yig'ilishini chaqirishga va uning kun tartibini belgilashga haqli.

52. Aksiyadorlarning umumiy yig'ilishini o'tkazish sanasi va tartibi, yig'ilish o'tkazilishi haqida aksiyadorlarga xabar berish tartibi, aksiyadorlarning umumiy yig'ilishini o'tkazishga tayyorgarlik vaqtida aksiyadorlarga beriladigan materiallarning (axborotning) ro'yxati Bank Kuzatuv kengashi tomonidan belgilanadi.

53. Aksiyadorlarning umumiy yig'ilishida ishtirok etish uchun ro'yxatdan o'tkazish tugallangan paytda Bankning joylashtirilgan ovoz beruvchi aksiyalarining jami ellik foizidan ko'proq ovoziga ega bo'lgan aksiyadorlar (ularning vakillari) ro'yxatdan o'tgan bo'lsa, aksiyadorlarning umumiy yig'ilishi vakolatli (kvorumga ega) bo'ladi.

54. Aksiyadorlarning umumiy yig'ilishining vakolat doirasiga quyidagilar kiradi:

Bank Ustaviga o'zgartirish va qo'shimchalar kiritish yoki Bankning yangi tahrirdagi Ustavini tasdiqlash;

Bankni qayta tashkil etish;

Bankni tugatish, tugatuvchini (tugatish komissiyasini) tayinlash hamda oraliq va yakuniy tugatish balanslarini tasdiqlash;

Bank Kuzatuv kengashining va minoritar aksiyadorlar qo'mitasining son tarkibini belgilash, ularning a'zolarini tayinlash (saylash) va a'zolarining vakolatlarini muddatidan ilgari tugatish;

Bankning Kuzatuv kengashi a'zolariga haq to'lash;

e'lon qilingan aksiyalarning eng ko'p miqdorini belgilash;

Bankning ustav kapitalini kamaytirish;

o'z aksiyalarini olish;

Bankning tashkiliy tuzilmasini tasdiqlash;

Bankning yillik hisobotini, shuningdek Bank faoliyatining asosiy yo'nalishlari va maqsadidan kelib chiqqan holda Bankni o'rta muddatga va uzoq muddatga rivojlantirishning aniq muddatlari belgilangan strategiyasini tasdiqlash;

Bankning foydasi va zararlarini taqsimlash;

Bank Kuzatuv kengashining o'z vakolat doirasiga kiradigan masalalar yuzasidan, shu jumladan Bankni boshqarishga doir qonunchilikda belgilangan talablarga rioya etilishi yuzasidan Bank Kuzatuv

kengashining hisobotlarini eshitish;

aksiyadorlar tomonidan Bank aksiyalarini va aksiyalarga ayirboshlanadigan emissiyaviy qimmatli qog'ozlarni sotib olishda imtiyozli huquqni qo'llamaslik to'g'risida qarorni qabul qilish;

Aksiyadorlar umumiy yig'ilishining reglamentini tasdiqlash;

aksiyalarni maydalash va yiriklashtirish;

"Aksiyadorlik jamiyatlari va aksiyadorlarning huquqlarini himoya qilish to'g'risida"gi Qonunning 8-bobida (Yirik bitimlar tuzish) va 9-bobida (Affillangan shaxslar bilan bitimlar tuzish) nazarda tutilgan hollarda Bank tomonidan bitimlar tuzish to'g'risida qaror qabul qilish;

Bank Kuzatuv kengashining vakolatidagi yirik bitim tuzish masalasi bo'yicha Bank Kuzatuv kengashining yakdilligiga erishilmagan taqdirda ushbu yirik bitim tuzish to'g'risida qaror qabul qilish;

majburiy auditorlik tekshiruvini o'tkazish uchun auditorlik tashkilotini belgilash, ushbu tashkilotning xizmatlariga to'lanadigan eng ko'p haq miqdori va u bilan shartnoma tuzish (shartnomani bekor qilish) to'g'risida qaror qabul qilish;

sanoq komissiyasining miqdor va shaxsiy tarkibini tasdiqlash;

dividendlar to'lash, dividendning miqdori, uni to'lash shakli va tartibi to'g'risida qaror qabul qilish;

qonunchilik hujjatlariga muvofiq Aksiyadorlar umumiy yig'ilishining mutlaq vakolatiga kiruvchi Bankning ichki meyoriy hujjatlarini tasdiqlash hamda ularga o'zgartirish va qo'shimchalar kiritish;

qonunchilik hujjatlariga muvofiq boshqa masalalarni hal etish.

55. Aksiyadorlar umumiy yig'ilishining vakolat doirasiga kiritilgan masalalar Bankning Kuzatuv kengashi va Boshqaruvi hal qilishi uchun berilishi mumkin emas.

"Aksiyadorlik jamiyatlari va aksiyadorlarning huquqlarini himoya qilish to'g'risida"gi Qonunga muvofiq Aksiyadorlar umumiy yig'ilishining vakolat doirasiga kiritilgan quyidagi masalalar Bankning Kuzatuv kengashi hal qilishi uchun berildi:

Bankning ustav kapitalini ko'paytirish, shuningdek Bank Ustaviga Bankning ustav ustav kapitalini ko'paytirish hamda Bankning e'lon qilingan aksiyalari sonini kamaytirish bilan bog'liq o'zgartirish va qo'shimchalar kiritish;

"Aksiyadorlik jamiyatlari va aksiyadorlarning huquqlarini himoya qilish to'g'risida"gi Qonunning 34-moddasiga muvofiq aksiyalarni joylashtirish (tashkil etilgan qimmatli qog'ozlar savdolariga chiqarish) narxini belgilash;

Bank tomonidan korporativ obligatsiyalar, shu jumladan, aksiyalarga ayirboshlanadigan obligatsiyalar chiqarish to'g'risida qaror qabul qilish;

qimmatli qog'ozlarning hosilalarini chiqarish to'g'risida qaror qabul qilish;

Bankning korporativ obligatsiyalarini qaytarib sotib olish to'g'risida qaror qabul qilish;

Bankning Boshqaruvini tuzish, uning rahbarini uch yilga saylash (tayinlash), rahbarning vakolatlarini muddatidan ilgari tugatish;

Bankning Bank Boshqaruviga to'lanadigan haq va (yoki) kompensatsiyalarni, shuningdek ularning eng yuqori miqdorlarini belgilash;

Bankning yillik biznes rejasini tasdiqlash;

56. Aksiyadorlarning umumiy yig'ilishida ovozga qo'yilgan masala bo'yicha aksiyadorlar umumiy yig'ilishining qarori, agar qonunchilik hujjatlarida boshqacha qoida belgilanmagan bo'lsa, Bankning ovoz beruvchi aksiyalari egalari bo'lgan, yig'ilishda ishtirok etayotgan aksiyadorlarning ko'pchilik (oddiy ko'pchilik) ovozi bilan qabul qilinadi.

Aksiyadorlarning umumiy yig'ilishida ovoz berish "Bankning ovoz beruvchi bitta aksiyasi – bitta ovoz" prinsipi bo'yicha amalga oshiriladi, Bankning Kuzatuv kengashi a'zolarini saylash bo'yicha kumulyativ ovoz berishni o'tkazish hollari bundan mustasno.

Aksiyadorlar umumiy yig'ilishida aksiyadorlar vakili sifatida ishtirok etuvchi Boshqaruv raisi va Boshqaruv a'zolari o'zlari bilan tuzilgan shartnomaning muddatini uzaytirish, uni qayta tuzish yoki bekor qilish mumkinligi haqidagi masalalar bo'yicha ovoz berish huquqiga ega bo'lmaydi.

Quyidagi masalalar bo'yicha qarorlar Aksiyadorlar umumiy yig'ilishi tomonidan yig'ilishda ishtirok etayotgan ovoz beruvchi aksiyalarning egalari bo'lgan aksiyadorlarning to'rtidan uch qismidan iborat ko'pchilik (malakali ko'pchilik) ovozi bilan qabul qilinadi:

Bank Ustaviga o'zgartirish va qo'shimchalar kiritish yoki Bankning yangi tahrirdagi Ustavini tasdiqlash;

Bankni qayta tashkil etish;

Bankni tugatish, tugatuvchini (tugatish komissiyasini) tayinlash hamda oraliq va yakuniy tugatish balanslarini tasdiqlash;

e'lon qilingan aksiyalarning eng ko'p miqdorini belgilash;

Bank Kuzatuv kengashining o'z vakolat doirasiga kiradigan masalalar yuzasidan, shu jumladan Bankni boshqarishga doir qonunchilikda belgilangan talablarga rioya etilishi yuzasidan Bank Kuzatuv kengashining hisobotlarini eshitish;

Balans qiymati yoki olish qiymati bitim tuzish to'g'risida qaror qabul qilinayotgan sanada Bank sof aktivlari miqdorining ellik foizidan ortig'ini tashkil etuvchi mol-mulk xususida yirik bitim tuzish to'g'risida qaror qabul qilish;

Bank Kuzatuv kengashining vakolatidagi yirik bitim tuzish masalasi bo'yicha Bank Kuzatuv kengashining yakdilligiga erishilmagan taqdirda ushbu yirik bitim tuzish to'g'risida qaror qabul qilish;

qonunchilik hujjatlarida ko'rsatilgan hollarda Bankning affillangan shaxslari bilan bitimlar tuzish haqida qarorlar qabul qilish.

57. Aksiyadorlar umumiy yig'ilishining kun tartibiga kiritilmagan masalalar bo'yicha qaror qabul qilishga, shuningdek kun tartibiga o'zgartishlar kiritish mumkin emas.

58. Aksiyadorlar umumiy yig'ilishining bayonnomasi Aksiyadorlarning umumiy yig'ilishi yopilganidan keyin 10 (O'n) kundan kechiktirmay ikki nusxada tuziladi. Har ikkala nusxa ham Umumiy yig'ilishda raislik qiluvchi va umumiy yig'ilish kotibi tomonidan imzolanadi.

Aksiyadorlarning umumiy yig'ilishi tomonidan qabul qilingan qarorlar, shuningdek ovoz berish yakunlari amaldagi qonunchilik hujjatlarida nazarda tutilgan tartib va muddatlarda, biroq bu qarorlar qabul qilingan sanadan e'tiboran o'ttiz kundan kechiktirmay aksiyadorlar e'tiboriga yetkaziladi.

59. Aksiyadorlar umumiy yig'ilishi tomonidan qabul qilingan qarorlar amaldagi qonunchilik hujjatlarida nazarda tutilgan tartib va muddatlarda e'lon qilinadi.

60. Aksiyadorlar umumiy yig'ilishini tashkil etish va o'tkazish bilan bog'liq boshqa masalalar amaldagi qonunchilik hujjatlari va Aksiyadorlarning umumiy yig'ilishi to'g'risidagi nizom bilan tartibga solinadi.

Bank Kuzatuv kengashi.

61. Bank Kuzatuv kengashi Bank faoliyatiga umumiy rahbarlikni amalga oshiradi, boshqaruvga oid qarorlar qabul qilish jarayonida nazorat va tekshiruv vazifasini bajaradi hamda umuman Bankning faoliyati va moliyaviy barqarorligi uchun javobgar hisoblanadi, O'zbekiston Respublikasining "Aksiyadorlik jamiyatlari va aksiyadorlar huquqlarini himoya qilish to'g'risida"gi Qonuni va mazkur Ustav bilan Aksiyadorlar umumiy yig'ilishining vakolat doirasiga kiritilgan masalalarni hal etish bundan mustasno.

62. Bank Kuzatuv kengashi Bankni samarali va tadbirli boshqarishni, shu jumladan Bank Boshqaruvi a'zolari o'rtasida vakolatlarning hamda javobgarlikning taqsimlanishini, manfaatlar to'qnashuvining oldi olinishini va bartaraf etilishini ta'minlaydigan boshqaruv tashkiliy tuzilmasini belgilaydi hamda uning joriy etilishi ustidan nazorat va tekshiruvni amalga oshiradi.

Bank Kuzatuv kengashi a'zolari Bankning oqilona korporativ boshqaruviga ko'maklashishi hamda o'z vakolatlarini va majburiyatlarini bajarish chog'ida Bankning, uning omonatchilari va aksiyadorlarining qonuniy manfaatlarini inobatga olishi, shuningdek Markaziy bank bilan samarali hamkorlikni ta'minlashi kerak.

63. Bank Kuzatuv kengashining vakolat doirasiga quyidagilar kiradi:

Bankni rivojlantirish strategiyasiga erishish bo'yicha ko'rilayotgan chora-tadbirlar to'g'risida Bank Boshqaruvining hisobotini muntazam ravishda eshitib borgan holda Bank faoliyatining ustuvor yo'nalishlarini belgilash;

aksiyadorlarning yillik va navbatdan tashqari umumiy yig'ilishlarini chaqirish, qonunchilik hujjatlarida nazarda tutilgan hollar bundan mustasno;

aksiyadorlar umumiy yig'ilishining kun tartibini tayyorlash;
aksiyadorlarning umumiy yig'ilishi o'tkaziladigan sana, vaqt va joyni belgilash;

aksiyadorlarning umumiy yig'ilishi o'tkazilishi haqida xabar qilish uchun Bank aksiyadorlarining reyestrini shakllantirish sanasini belgilash;

Bank Ustaviga o'zgartish va qo'shimchalar kiritish yoki Bankning yangi tahrirdagi ustavini tasdiqlash masalalarni aksiyadorlarning umumiy yig'ilishi hal qilishi uchun kiritish;

mol-mulkning bozor qiymatini belgilashni tashkil etish;

korporativ maslahatchini tayinlash va uning faoliyati tartibini belgilovchi nizomni tasdiqlash;

ichki audit xizmatini tashkil etish va uning xodimlarini tayinlash, shuningdek har chorakda uning hisobotlarini eshitib borish;

Bank Boshqaruvining faoliyatiga daxldor har qanday hujjatlardan erkin foydalanish va Bank Kuzatuv kengashi zimmasiga yuklatilgan vazifalarni bajarish uchun bu hujjatlarni Bank Boshqaruvidan olish. Bank Kuzatuv kengashi va uning a'zolari olingan hujjatlardan faqat xizmat maqsadlarida foydalanishi;

auditorlik tekshiruvini o'tkazish (majburiy auditorlik tekshiruvi bundan mustasno), auditorlik tashkilotini belgilash, uning xizmatlariga to'lanadigan eng ko'p haq miqdori va u bilan shartnoma tuzish (shartnomani bekor qilish) to'g'risida qaror qabul qilish;

dividend miqdori, uni to'lash shakli va tartibi yuzasidan tavsiyalar berish;

Bankning zaxira fondidan va boshqa fondlaridan foydalanish;

Bankning filiallarini, bank xizmatlari ofisini va boshqa alohida bo'linmalarini hamda vakolatxonalarini ochish hamda yopish;

Bankning shu'ba va tobe xo'jalik jamiyatlarini tashkil etish;

"Aksiyadorlik jamiyatlari va aksiyadorlarning huquqlarini himoya qilish to'g'risida"gi Qonunning 8-bobida (Yirik bitimlar tuzish) va 9-bobida (Affillangan shaxslar bilan bitimlar tuzish) nazarda tutilgan hollarda Bank tomonidan bitimlar tuzish to'g'risida qaror qabul qilish;

yirik bitim tuzish masalasi bo'yicha Bank Kuzatuv kengashining yakdilligiga erishilmagan takdirda yirik bitim tuzish masalasini Aksiyadorlar umumiy yig'ilishiga hal qilishi uchun olib chiqish to'g'risida qaror qabul qilish;

Bankning tijorat va notijorat tashkilotlardagi ishtiroki bilan bog'liq bitimlarni qonunchilikda belgilangan tartibda tuzish;

Bank Kuzatuv kengashi qoshidagi qo'mitalarni tuzish va ular to'g'risidagi nizomlarni tasdiqlash;

Bankning ustav kapitalini ko'paytirish, shuningdek Bank Ustaviga Bankning ustav kapitalini ko'paytirish hamda Bankning e'lon qilingan aksiyalari sonini kamaytirish bilan bog'liq o'zgartish va qo'shimchalar kiritish;

“Aksiyadorlik jamiyatlari va aksiyadorlarning huquqlarini himoya qilish to‘g‘risida”gi Qonunning 34-moddasiga muvofiq aksiyalarni joylashtirish (tashkil etilgan qimmatli qog‘ozlar savdolariga chiqarish) narxini belgilash;

Bank tomonidan depozit sertifikatlarini chiqarish, ularni qaytarib sotib olish to‘g‘risida qarorlar qabul qilish;

Bank tomonidan korporativ obligatsiyalar, shu jumladan, aksiyalarga ayirboshlanadigan obligatsiyalar chiqarish to‘g‘risida qaror qabul qilish;

qimmatli qog‘ozlarning hosilalarini chiqarish to‘g‘risida qaror qabul qilish;

Bankning korporativ obligatsiyalarini qaytarib sotib olish to‘g‘risida qaror qabul qilish;

Bankning Boshqaruvini tuzish, uning rahbarini saylash (tayinlash), rahbarning vakolatlarini muddatidan ilgari tugatish;

Bank Boshqaruvi a‘zolarini saylash (tayinlash), ularning vakolatlarini muddatidan ilgari tugatish;

Bankning Boshqaruviga to‘lanadigan haq va (yoki) kompensatsiyalarni, shuningdek ularning eng yuqori miqdorlarini belgilash;

Bankning yillik biznes rejasini tasdiqlash;

Bank Boshqaruvi raisi bilan mehnat shartnomasini tuzish, shartnomaning amal qilish muddatini uzaytirish yoki uni bekor qilish;

Bank Boshqaruv raisining vakolati muddatidan ilgari tugatilgan taqdirda, uning vazifasini vaqtincha bajaruvchini tayinlash;

qonunchilik hujjatlariga muvofiq Bank Kuzatuv kengashi vakolatiga kiruvchi Bankning boshqa ichki meyoriy hujjatlarini tasdiqlash hamda ularga o‘zgartirish va qo‘shimchalar kiritish;

Bankning kapital va umumiy zaxiralarining yetarli darajada saqlab turilishini ta‘minlash;

biznes reja doirasida xayriya, homiylik va beg‘araz yordam berish to‘g‘risida qarorlar qabul qilish;

Bankning uzoq muddatli moliyaviy manfaatlarini va Markaziy bank tomonidan kapitalga nisbatan belgilangan talablarni hisobga olgan holda prudensial talablarga rioya etilishini ta‘minlash;

qonunchilik hujjatlariga hamda mazkur Ustavga muvofiq Bank Kuzatuv kengashining vakolat doirasiga kiruvchi boshqa masalalarni hal qilish.

64. Bank Kuzatuv kengashining vakolat doirasiga kiritilgan masalalar hal qilish uchun Bank Boshqaruviga o‘tkazilishi mumkin emas.

65. Bank Kuzatuv kengashining a‘zolari Aksiyadorlar umumiy yig‘ilishi tomonidan uch yil muddatga saylanadi.

Bank Kuzatuv kengashi tarkibiga saylangan shaxslar cheklanmagan tarzda qayta saylanishi mumkin.

Bank Boshqaruvi a‘zolari va uning sho‘ba va tobe xo‘jalik jamiyatlarida mehnat shartnomasi (kontrakt) bo‘yicha ishlayotgan shaxslar va ushbu jamiyatlar

boshqaruv organlarining a'zolari Bank Kuzatuv kengashiga saylanishi mumkin emas.

Bankda mehnat shartnomasi (kontrakt) bo'yicha ishlayotgan shaxslar Bank Kuzatuv kengashi a'zosi bo'lishi mumkin emas.

Bankning Kuzatuv kengashi a'zolari soni besh kishini tashkil qiladi va bulardan kamida bir nafari mustaqil a'zodan iborat bo'ladi.

Quyidagilar Kuzatuv kengashining mustaqil a'zosi bo'lishi mumkin emas:

so'nggi uch yil ichida Bankda va (yoki) Bankning affillangan shaxslarida ishlagan shaxs;

Bankning aksiyadorlari;

Bankning va (yoki) uning affillangan shaxsining yirik mijozi va (yoki) yirik yetkazib beruvchisi bilan fuqarolik-huquqiy munosabatlarda bo'lgan shaxs. Bunda qaysi shaxslar bilan bazaviy hisoblash miqdorining ikki ming baravaridan ko'p bo'lgan summaga teng amaldagi shartnoma mavjud bo'lsa, o'sha shaxslar yirik mijoz va yirik yetkazib beruvchi deb e'tirof etiladi;

so'nggi uch yil ichida Bankka va (yoki) Bankning affillangan shaxslariga auditorlik xizmatlarini ko'rsatgan auditorlik tashkilotining xodimi;

ketma-ket olti yil davomida Bankning Kuzatuv kengashi tarkibiga kirgan shaxs;

Bank va (yoki) uning affillangan shaxslari bilan biror-bir kelishuvga ega bo'lgan shaxs, bundan Kuzatuv kengashi a'zosining vazifalari bajarilishini ta'minlash bilan bog'liq bo'lgan kelishuvlar mustasno;

Bankning boshqaruv va ichki nazorat organlarining va (yoki) uning affillangan shaxslarining a'zosi bo'lgan shaxsning yoki so'nggi uch yil ichida ularga a'zo bo'lgan shaxsning yaqin qarindoshi yoki quda tomondan qarindoshi (ota-onasi, aka-ukalari, opa-singillari, o'g'illari, qizlari, eri (xotini), shuningdek erining (xotinining) ota-onasi, aka-ukalari, opa-singillari va farzandlari) bo'lgan shaxs;

davlat boshqaruvi organining yoki davlat korxonasining xodimi bo'lgan shaxs;

Bankning ustavida yoki Aksiyadorlar umumiy yig'ilishi qarorlari bilan tasdiqlangan hujjatlarda belgilangan talablarga muvofiq bo'lmagan shaxs.

Bank Bankning Kuzatuv kengashi tarkibiga saylangan mustaqil a'zolarining reyestrini yuritadi va uni o'z rasmiy veb-saytida e'lon qiladi.

Bank Kuzatuv kengashi mustaqil a'zolarining reyestrini yuritish tartibi qimmatli qog'ozlar bozorini tartibga solish bo'yicha vakolatli davlat organi tomonidan belgilanadi.

Bank Kuzatuv kengashi mustaqil a'zosining ushbu bandning oltinchi xatboshisida belgilangan talablarga muvofiqligi o'zgargan taqdirda, u Bankni va Kuzatuv kengashini bu haqda ikki ish kuni ichida xabardor qilishi shart va boshqa nomzod mustaqil a'zo sifatida taklif etiladi.

Kuzatuv kengashi a'zolarining ko'pchiligi Bankka aloqador shaxslar bo'lmisligi kerak, bundan ularning Kuzatuv kengashidagi a'zoliigi mustasno.

Bank Kuzatuv kengashining mustaqil a'zosi Kuzatuv kengashining boshqa a'zolari bilan bir qatorda "Aksiyadorlik jamiyatlari va aksiyadorlar huquqlarini himoya qilish to'g'risida"gi O'zbekiston Respublikasi Qonunida belgilangan teng huquqlar va majburiyatlarga ega bo'ladi.

Bank Kuzatuv kengashi a'zolari o'z mulohazalarining mustaqilligi bo'yicha talablarga rioya etishi kerak.

Bank Kuzatuv kengashining a'ziligiga ko'rsatilayotgan nomzodlarni ularning lavozimga kirishishidan oldin Markaziy bank bilan kelishiladi.

66. Bank Kuzatuv kengashi ishini tashkil etish Kuzatuv kengashining raisi tomonidan amalga oshiriladi. Kuzatuv kengashining raisi Kuzatuv kengashi majlislarini chaqiradi va ularda raislik qiladi, majlislarda bayonnoma yuritilishini tashkil etadi.

Bank Kuzatuv kengashining raisi bo'lmagan taqdirda uning vazifasini Bank Kuzatuv kengashi a'zolaridan biri amalga oshiradi.

67. Bank Kuzatuv kengashi majlisi Bank Kuzatuv kengashi raisi tomonidan uning o'z tashabbusiga ko'ra yoki Bank Kuzatuv kengashi a'zosining, Bank Boshqaruvi a'zosining, Bank ichki audit xizmati rahbarining, Bankning tashqi auditorining, Markaziy bankining talabiga ko'ra chaqiriladi.

68. Bank Kuzatuv kengashi majlisini o'tkazish uchun kvorum Bank Kuzatuv kengashi a'zolari belgilangan sonining kamida 75 (Yetmish besh) foizini tashkil qilishi kerak.

69. Bank Kuzatuv kengashining majlisida qarorlar, agar qonunchilik hujjatlarida va mazkur Ustavda o'zgacha qoida nazarda tutilmagan bo'lsa, majlisda hozir bo'lganlarning ko'pchilik ovozi bilan qabul qilinadi. Bank Kuzatuv kengashining majlisida masalalar hal etilayotganda Bank Kuzatuv kengashining har bir a'zosi bitta ovozga ega bo'ladi.

70. Bank Kuzatuv kengashining majlisida quyidagi qarorlar bir ovozdan qabul qilinishi lozim:

Bankning ustav kapitalini ko'paytirish, shuningdek Bank Ustaviga Bankning ustav kapitalini ko'paytirish hamda Bankning e'lon qilingan aksiyalari sonini kamaytirish bilan bog'liq o'zgartish va qo'shimchalar kiritish;

aksiyalarga ayirboshlanadigan korporativ obligatsiyalar chiqarish;

balans qiymati yoki olish qiymati bitim tuzish to'g'risida qaror qabul qilinayotgan sanada Bank sof aktivlari miqdorining 15 (O'n besh) foizidan 50 (Ellik) foizigachasini tashkil etuvchi mol-mulk xususida yirik bitim tuzish;

affillangan shaxs bilan bitim tuzish.

71. Bank Kuzatuv kengashining qarorlari sirtdan ovoz berish yo'li bilan (so'rov yo'li bilan) Bank Kuzatuv kengashining barcha a'zolari tomonidan bir ovozdan qabul qilinishi mumkin.

72. Bank Kuzatuv kengashining bir a'zosi o'z ovozini Bank Kuzatuv kengashining boshqa a'zosiga berishiga yo'l qo'yilmaydi. Bank Kuzatuv kengashi

a'zolarining ovozlari teng bo'lgan taqdirda Bank Kuzatuv kengashi tomonidan qaror qabul qilishda Bank Kuzatuv kengashi raisining ovozi hal qiluvchi hisoblanadi.

73. Bank Kuzatuv kengashi faoliyati va yig'ilishini tashkil etish va o'tkazish bilan bog'liq boshqa masalalar amaldagi qonunchilik hujjatlari va Bank Kuzatuv kengashi to'g'risidagi nizom bilan tartibga solinadi.

Bank Boshqaruvi.

74. Bank Boshqaruvi Bankni boshqarishning ijro etuvchi organi bo'lib, u Bankning kundalik faoliyatiga rahbarlik qiladi, Bank Kuzatuv kengashi tomonidan tasdiqlangan faoliyat strategiyasi va uni boshqarish tizimiga muvofiq Bankning faoliyatiga operativ boshqaruvni amalga oshiradi hamda Bankning faoliyati uchun javobgarlikni to'liq zimmasiga oladi.

75. Bank Boshqaruvi tarkibi 5 (Besh) a'zodan, shu jumladan Boshqaruv raisi va uning a'zolaridan iborat.

76. Bank Boshqaruvning a'zoriga hamda muhim ahamiyatga ega xodimlar lavozimlariga ko'rsatilayotgan nomzodlarni ularning lavozimga kirishishidan oldin Markaziy bank bilan kelishiladi. Agar muhim ahamiyatga ega xodimlarni obyektiv sabablarga ko'ra oldindan kelishib olishning imkoni bo'lmasa, Bank keyinchalik rozilik olish uchun so'rovnomaga yuboriladi.

77. Boshqaruv raisi va Bank Boshqaruvi a'zolari amaldagi qonunchilik hujjatlariga muvofiq Bank Kuzatuv kengashi tomonidan o'rnatilgan tartibda tayinlanadi va lavozimidan ozod qilinadi.

Bank Boshqaruvi raisi va a'zolari bilan shartnoma uch yil muddatga tuziladi.

78. Bank Boshqaruvining vakolatlariga Bank joriy faoliyatiga rahbarlik qilishga doir barcha masalalar kiradi, Aksiyadorlar umumiy yig'ilishining mutlaq vakolatlariga va Bank Kuzatuv kengashining vakolatlariga kiritilgan masalalar bundan mustasno. Jumladan, Bank Boshqaruvining vakolat doirasiga quyidagilar kiradi:

Aksiyadorlar umumiy yig'ilishi va Bank Kuzatuv kengashi qarorlarining bajarilishini tashkil etish va/yoki ijrosini ta'minlash;

Bankning siyosatlari va strategiyasini joriy etilishini hamda biznes-reja ijrosini ta'minlash;

qonunchilik hujjatlariga asosan Bank Boshqaruvi vakolatiga kiruvchi Bankning ichki meyoriy hujjatlarini hamda Bankning tarkibiy tuzilmalari haqidagi nizomlarni tasdiqlash;

korporativ boshqaruvining zamonaviy va ilg'or uslublarini joriy etish, korporativ boshqaruv kodeksi tavsiyalarini tatbiq etilishini tashkil qilish va Bankning korporativ boshqaruvga oid siyosatni ishlab chiqish;

Bankda qonunchilik hujjatlari va halqaro standartlarga muvofiq buxgalteriya hisobini yuritilishini va moliyaviy hisobot taqdim etilishini, monitoring qilish va tavakkalchiliklar to'g'risida xabardor etish, kapitalning yetarliligini lozim darajada

saqlab turish siyosatini amalga oshirish;

Bankning faoliyati yakunlarini, depozitlarni qabul qilish, aktivlarni joylashtirish, kreditlashni tashkil etish, hisob-kitoblar, pul muomalasi, kassa xizmati, tashqi iqtisodiy faoliyatni tashkil etish masalalarini ko'rib chiqish;

Bank xizmatlarining yangi turlarini ishlab chiqish va joriy etish;

hisob-kitob xizmatlari ko'rsatish, kredit, pul va to'lov hujjatlari va xat-hujjatlarni rasmiylashtirishning umumiy shartlari va tartibini belgilash;

strategik maqsadlarni, korporativ boshqaruv siyosatini, Bankning boshqa ichki siyosatlarini, shu jumladan tavakkalchiliklarni aniqlash, boshqarish, monitoring qilish va tavakkalchiliklar to'g'risida xabardor etish, kapitalning yetarililigini lozim darajada saqlab turish siyosatini amalga oshirish;

Bankning tegishli va shaffof tashkiliy tuzilmasini, shu jumladan vakolatlarni va javobgarlikni Bank xodimlari o'rtasida o'z vakolatlari doirasida taqsimlashni ta'minlashi;

Bank xodimlarining faoliyati ustidan nazoratni amalga oshirishi;

Bankning ish amaliyotiga eng ilg'or bank texnologiyalari, Bank ishlarini kompleks avtomatlashtirish loyihalari joriy etilishini tashkil etish, zamonaviy bank infratuzilmasi yaratilishini ta'minlash;

Bank mijozlariga ko'rsatiladigan xizmatlar bo'yicha xizmat haqi miqdorini belgilash;

Bank aktivlarining diversifikatsiyalanishini amalga oshirish;

Bank tomonidan Markaziy bank belgilagan iqtisodiy normativlarga hamda majburiy zahiralarini shakllantirish yuzasidan talablarga rioya qilinishini ta'minlash;

Bankning kapitali va likvidli resurslari yetarli darajada bo'lishini, aktivlarni tasniflash orqali ehtimoliy yo'qotishlarga qarshi zaxiralar yaratilishini ta'minlash;

qonunchilik hujjatlarida belgilangan tartib hamda xalqaro standartlarga muvofiq bank buxgalteriya hisobi va hisoboti yuritilishini tashkil etish;

Bankning qabul qilingan yillik biznes-rejasini bajarishi, shuningdek, Aksiyadorlar umumiy yig'ilishiga va Bank Kuzatuv kengashiga bajarilgan ishlar, moliyaviy natijalar, Bankka nisbatan qo'llanilgan choralar hamda sanksiyalar to'g'risidagi hisobotni davriy ravishda taqdim etish;

Bank Kuzatuv kengashida ko'rib chiqish uchun Aksiyadorlar umumiy yig'ilishi tomonidan tasdiqlangan uzoq muddatli strategiya asosida qisqa muddatli biznes-rejalarni va Bank Kuzatuv kengashi vakolatlariga taalluqli boshqa masalalar bo'yicha takliflar kiritish;

Bankda qonunchilik hujjatlari va boshqa meyoriy-huquqiy hujjatlarga rioya qilinishi ustidan nazorat qilish;

ishchi organlarni, shu jumladan Bank qo'mitalar va komissiyalarini tuzish, ularning vakolatlarini belgilash va nizomlarni tasdiqlash;

balans qiymati yoki olish qiymati bitim tuzish to'g'risida qaror qabul qilinarayotgan sanada bank sof aktivlari miqdorining o'n besh foizigacha bo'lgan

miqdordagi bitimlarini tuzish to'g'risida qarorlarni qabul qilish;

Bank Boshqaruvi vakolati doirasida bo'lgan qimmatli qog'ozlarni chiqarish va muomalada bo'lish to'g'risidagi qaror qabul qilish;

Bank Ustavida hamda qonunchilikda nazarda tutilgan boshqa majburiyatlarni bajarish.

79. Bank Boshqaruvi Aksiyadorlar umumiy yig'ilishi va Bank Kuzatuv kengashiga hisobdor.

80. Bank Boshqaruvi majlisini o'tkazish uchun kvorum Bank Boshqaruvi a'zolari belgilangan sonining kamida 75 (Yetmish besh) foizini tashkil qilishi kerak.

Bank Boshqaruvining majlisida qarorlar, agar qonunchilik hujjatlarida va mazkur Ustavda o'zgacha qoida nazarda tutilmagan bo'lsa, majlisda hozir bo'lganlarning ko'pchilik ovozi bilan qabul qilinadi. Bank Boshqaruvining majlisida masalalar hal etilayotganda Bank Boshqaruvining har bir a'zosi bitta ovozga ega bo'ladi.

81. Bank Boshqaruvi raisi quyidagi vakolatlarga ega:

Bankning kundalik faoliyatiga tezkor rahbarlik qilish;

Bank nomidan Ustavga asosan ishonchnomasiz ish yuritish;

Bank nomidan bitim va shartnomalar, shu jumladan mehnat shartnomalarini tuzish;

Bankning ichki meyoriy hujjatlarida belgilangan tartibda uning mol-mulki va pul mablag'larini tasarruf qilish;

Bank nomidan harakat qilish uchun xodimlarga ishonchnomalar berish;

Boshqaruv raisi o'rinbosarlarining hamda tarkibiy tuzilmalari rahbarlarining lavozim majburiyatlarini tasdiqlash;

Boshqaruv raisi o'rinbosarlari o'rtasida vazifalarni taqsimlash;

Bank faoliyatini samarali tashkil qilish maqsadida Bankning tashkiliy tuzilmasi doirasida tarkibiy tuzilmalarni tashkil qilish va o'zgartirish;

boshqa tashkilotlar va organlar bilan bo'lgan o'zaro munosabatlarda Bankning manfaatlarini ifodalash;

Bankning xodimlarini, vakolatxonalar va sho'ba korxonalar rahbarlarini tayinlash, lavozim oylik maoshlarini belgilash hamda ularni lavozimdan ozod qilish;

shtat jadvallarini tasdiqlash;

xodimlarni rag'batlantirish, ularga nisbatan intizomiy jazolarni qo'llash, shuningdek intizomiy jazolarni olib tashlash;

o'z vakolati doirasida Bank tizimida bajarilishi majburiy bo'lgan buyruq, farmoyish va ko'rsatmalarni berish;

Boshqaruv raisi amaldagi qonunchilik, mazkur Ustav va Bankning boshqa ichki meyoriy xujjatlariga binoan boshqa vakolatlarga ega.

82. Bank Boshqaruvi raisi va Boshqaruv a'zolari bilan shartnomalarni Bank nomidan Bank Kuzatuv kengashi raisi yoki Bank Kuzatuv kengashi vakolat bergan shaxs imzolaydi.

Boshqaruv raisi Bankning rahbarlari va xodimlarini buyruq bilan tayinlaydi va ular bilan Bank nomidan shartnomalarni tuzadi.

83. Bank Boshqaruvi va Bankning tarkibiy tuzilmalari rahbarlari Bank hisobotidagi axborotning ishonchliligi uchun javob beradi.

84. Bank Kuzatuv kengashi va Boshqaruvining a'zolari o'z huquqlarini amalga oshirishda va o'z majburiyatlarini bajarishda Bankning manfaatlarini ko'zlab ish tutadi hamda belgilangan tartibda javobgar bo'ladi. Bank Kuzatuv kengashi va Boshqaruvi a'zolarining Bank oldidagi javobgarligi solidar hisoblanadi.

Agar Bank Boshqaruvi tomonidan yirik bitim yoki affillangan shaxslar bilan bitim tuzish tartibi buzilganligi natijasida Bankka zarar yetkazilgan bo'lsa va bunda Bank Boshqaruvi raisining yoki Boshqaruvi a'zolarining yoxud ishonchli boshqaruvchining aybi qonunchilikda belgilangan tartibda isbotlansa, Bankning kreditorlar oldidagi qarzдорligini qoplash uchun uning mol-mulki yetarli bo'lmagan taqdirda Bankning majburiyatlari bo'yicha subsidiar javobgar bo'ladi.

85. Bank Boshqaruvi faoliyati va yig'ilishini tashkil etish va o'tkazish bilan bog'liq boshqa masalalar amaldagi qonunchilik hujjatlari va Bank Boshqaruvi to'g'risidagi nizom bilan tartibga solinadi.

12-bob. Bankning hisobi va hisoboti

86. Bank buxgalteriya hisobini Markaziy bank tomonidan belgilangan qoidalar asosida ishlab chiqilgan ichki hisob-kitob siyosatiga muvofiq tashkil etadi va yuritadi.

87. Bankdagi buxgalteriya hisobi:

boshqaruvga, moliyaga, soliqqa va nazoratga oid hisobotning hamda boshqa hisobotlarning ishonchliligini, ularda bankning haqiqiy moliyaviy holati va faoliyati natijalari aks ettirilishini;

Bank aktivlarini va yuzaga keluvchi tavakkalchiliklarni boshqarish xavfsizligini;

Aksiyadorlar umumiy yig'ilishi va Bank Kuzatuv kengashi tomonidan Bankning moliyaviy ahvolini va uning mansabdor shaxslarining ishini nazorat qilish imkoniyatini ta'minlashi kerak.

88. Bankda buxgalteriya hisobining tashkil etilishi, holati va ishonchliligi, tegishli organlarga har yilgi hisobot va boshqa moliyaviy hisobotlar, shuningdek bankning rasmiy veb-saytida va ommaviy axborot vositalarida aksiyadorlarga, kreditorlarga taqdim etiladigan bank faoliyati to'g'risidagi ma'lumotlar o'z vaqtida taqdim etilishi uchun javobgarlik bank boshqaruvining zimmasida bo'ladi.

89. Bankning moliyaviy hisobotida ko'rsatilgan va aksiyadorlarning umumiy yig'ilishiga taqdim etiladigan moliyaviy hisobotdagi, buxgalteriya balansidagi,

foyda va zararlar hisobvarag'idagi ma'lumotlarning ishonchliligi mulkiy manfaatlari bank yoki uning aksiyadorlari bilan bog'liq bo'lmagan auditorlik tashkiloti tomonidan tasdiqlangan bo'lishi kerak.

90. Bank moliyaviy hisobotlarni, banklar guruhining asosiy banki konsolidatsiyalashgan moliyaviy hisobotlarni ularda ko'rsatilgan ma'lumotlarning to'g'riligini auditorlik tashkiloti tasdiqlaganidan keyin Markaziy bank tomonidan belgilanadigan shaklda e'lon qiladi.

91. Bank o'z mablag'lariga, kapitalga doir talablarning bajarilishiga, likvidlikka, tavakkalchiliklarning qiymatiga va boshqa muhim ko'rsatkichlarga (normativlarga) doir axborotni oshkor etishi kerak.

92. Bank o'z faoliyati to'g'risidagi hisobotlarni Markaziy bank tomonidan belgilangan shakllarda, tartibda va muddatlarda tuzadi hamda Markaziy bankka taqdim etadi.

Bank Markaziy bankning talabiga ko'ra konsolidatsiyalashgan, davriy, shuningdek bir martalik hisobotlarni taqdim etadi.

Bank Markaziy bankka taqdim etiladigan hisobotlarning va boshqa ma'lumotlarning yaxlitligi hamda ishonchliligi uchun javobgardir.

93. Bankning yillik hisoboti Aksiyadorlar umumiy yig'ilishi qarori qabul qilinganidan sanadan o'n kundan kechiktirmay Bankning Kuzatuv kengashi tomonidan dastlabki tarzda tasdiqlanishi lozim.

94. Bank Xalqaro moliyaviy hisobot standartlariga muvofiq tuzilgan yillik moliyaviy hisobotni u Xalqaro audit standartlariga muvofiq tashqi auditdan o'tkazilganidan keyin, Aksiyadorlar umumiy yig'ilishi qarori sanasidan kamida ikki hafta oldin e'lon qilishi shart.

95. Bank oshkor etilishi majburiy bo'lgan axborotni qonunchilik hujjatlarida belgilangan hajmda, muddatlarda va tartibda amalga oshiradi, shuningdek o'zi tomonidan emissiya qilinadigan qimmatli qog'ozlarga tegishli bo'lgan axborotni e'lon qiladi.

96. Bankning moliyaviy yili 1 yanvardan boshlanadi va 31 dekabrda tugaydi.

97. Bank bank faoliyati davomida shakllanadigan hujjatlarning lozim darajada hisobga olinishi, saqlanishi va undan foydalanilishini ta'minlaydi.

Bank qonunchilik hujjatlarida belgilangan tartibda va muddat mobaynida hujjatlarning saqlanishini ta'minlaydi.

13-bob. Bank faoliyatini nazorat qilish

98. Bankning moliya - xo'jalik faoliyatini hamda joriy faoliyatini nazorat qilish uchun Bankda ichki audit xizmati tashkil etiladi.

99. Bankning moliya-xo'jalik faoliyatini tekshirish Aksiyadorlar umumiy yig'ilishining, Bank Kuzatuv kengashining tashabbusiga ko'ra yoki Bank ovoz beruvchi aksiyalarining kamida besh foiziga egalik qiluvchi aksiyadorning

(aksiyadorlarning) talabiga ko'ra Bank Kuzatuv kengashini oldindan xabardor qilish yo'li bilan bir yillik yoki boshqa davr ichidagi faoliyat yakunlari bo'yicha amalga oshiriladi.

100. O'z funksiyalarini bajarish paytida Bankning ichki audit xizmati quyidagilarni amalga oshiradi:

Bank mol - mulkini taftishdan o'tkazish, ularni Bank moliyaviy hujjatlari va birlamchi buxgalteriya hisobi ma'lumotlari bilan taqqoslash;

Bank nomidan tuzilgan shartnomalar, amalga oshirilgan bitimlar, kontragentlar bilan hisob - kitoblarning qonunchilik hujjatlariga muvofiqqligini tekshirish;

Bankning moliyaviy holatini, uning to'lovga layoqatliligini, aktivlarining likvidliligini, o'z va jalb qilingan mablag'lari nisbatini tahlil qilish, zaxiralar yaratish, bank boshqaruvi organlari uchun tavsiyalar ishlab chiqish;

davlat soliq va statistika organlari, davlat boshqaruv organlari uchun Bank balansi, hisobot hujjatlarining to'g'ri tuzilganligini tekshirish;

Bank tomonidan qonunchilik hujjatlariga, Bank Ustaviga va boshqa hujjatlarga rioya etilishini baholaydi;

buxgalteriya hisobida va moliyaviy hisobotlarda ma'lumotlarning to'liq hamda ishonchli tarzda aks ettirilishi ta'minlanishini tekshiradi;

xo'jalik operatsiyalarini amalga oshirishning belgilangan qoidalari va tartib-taomillariga rioya etilishini tekshiradi

aktivlarning saqlanishini, shuningdek bankni boshqarish yuzasidan qonunchilik hujjatlarida belgilangan talablarga rioya etilishini tekshirish hamda monitoring olib borish orqali ishlarni nazorat qiladi hamda baholaydi.

101. Bankning moliya-xo'jalik faoliyatini tekshirish yakunlariga ko'ra Bankning ichki audit xizmati xulosa (dalolatnoma, ma'lumotnoma) tuzadi va xulosa Bank Kuzatuv kengashiga va/yoki Aksiyadorlar umumiy yig'ilishiga taqdim etiladi.

102. Bankning ichki audit xizmati o'z faoliyatini qonunchilikda belgilanadigan tartibga muvofiq amalga oshiradi.

103. Bank qonunchilik hujjatlarida belgilangan tartibda auditorlik tashkilotini jalb qiladi.

Auditorlik tashkiloti Bank bilan tuzilgan shartnomaga muvofiq qonunchilik hujjatlarida belgilangan tartibda Bank moliya-xo'jalik faoliyatining tekshirilishini amalga oshiradi va unga auditorlik xulosasini taqdim etadi.

104. Auditorlik tashkiloti Bankning moliyaviy hisoboti va moliyaga doir boshqa axborot haqidagi noto'g'ri xulosani o'z ichiga olgan auditorlik xulosasi tuzilganligi oqibatida yetkazilgan zarar uchun Bank oldida javobgar bo'ladi.

105. Bankda Bank Kuzatuv kengashiga hisobdor bo'lgan va korporativ qonunchilik hujjatlariga rioya etilishi ustidan nazorat qilish vazifasini bajaruvchi Bank korporativ maslahatchisi lavozimi joriy etilishi mumkin.

106. Bank korporativ maslahatchisining faoliyati Bank Kuzatuv kengashi tomonidan tasdiqlangan nizom asosida amalga oshiriladi.

14-bob. Bankni qayta tashkil etish va tugatish

107. Bankni qayta tashkil etish va tugatish Aksiyadorlar umumiy yig'ilishi qaroriga muvofiq Markaziy bankning ruxsati bilan qonunchilik hujjatlariga muvofiq amalga oshiriladi.

Bankni qayta tashkil etish va tugatish Markaziy bankning talabiga binoan ham amalga oshirilishi mumkin.

15-bob. Bank ustaviga o'zgartirish va qo'shimchalar kiritish

108. Bank Ustavi, shuningdek unga kiritiladigan barcha o'zgartirish va qo'shimchalar amaldagi qonunchilikda belgilangan tartibda qabul qilinadi hamda Markaziy bankda ro'yxatga olinadi.

16-bob. Yakunlovchi qoidalar

109. Ushbu Ustavda nazarda tutilmagan munosabatlar O'zbekiston Respublikasining "Aksiyadorlik jamiyatlari va aksiyadorlar huquqlarini himoya qilish to'g'risida"gi, "Banklar va bank faoliyati to'g'risida"gi Qonunlari va boshqa qonunchilik hujjatlari bilan tartibga solinadi.

110. Mazkur Ustavga kiritilgan o'zgartirish va qo'shimchalar yoki Ustavning yangi tahriri davlat ro'yxatidan o'tkazilgan paytdan boshlab uchinchi shaxslar uchun kuchga kiradi.

111. Mazkur Ustav bilan tartibga solinmagan masalalar O'zbekiston Respublikasining amaldagi qonunchilik hujjatlarida belgilangan tartibda hal etiladi.

112. Ushbu Ustavning alohida bandlari amaldagi qonunchilik hujjatlariga zid bo'lsa, ushbu bandlar o'z kuchini yo'qotadi va ushbu bandlarga o'zgartirish va qo'shimchalar kiritilgunga qadar O'zbekiston Respublikasining amaldagi qonunchilik hujjatlari normalariga amal qilinadi.

113. Mazkur yangi tahrirdagi Ustav Markaziy bankda davlat ro'yxatidan o'tkazilishi munosabati bilan Markaziy bank tomonidan 2022-yil 24-dekabr kuni 89-son bilan ro'yxatga olingan Bank Ustavi va Markaziy bank tomonidan 2023-yil 5-sentabrdagi 89/1-son, 2024-yil 6-fevraldagi 89/2-son, 2024-yil 5-apreldagi 89/3-son bilan ro'yxatga olingan Bank Ustaviga kiritilgan qo'shimcha va o'zgartirishlar o'z kuchini yo'qotgan deb hisoblanadi.

Kuzatuv kengashi raisi



Sh.A. Tashpo'lov